



DOM OSIGURAN PROTIV VATRE



Dobar savjet kako da zaštitite sebe i ●
svoju porodicu od vatre ●



Požari u norveškim domovima

Svake godine u Norveškoj umire oko 60 ljudi u požaru – većina u svom vlastitom domu. Pomoć vatrogasaca je potrebna u slučaju požara u preko 1600 domaćinstava, dok osiguravajuća društva dobivaju preko 25000 zahtjeva za nadoknadu štete nastale zbog požara. Većina ovih požara nastaje zbog nepažnje, neopreznosti i ravnodušnosti.



Zahtjev za detektor dima

Svako domaćinstvo po zakonu mora imati bar jedan detektor dima. U domaćinstvima sa više od jedne etaže preporučuje se najmanje jedan detektor po spratu. Detektori dima Vas pravovremeno obavještavaju da postoji opasnost od požara. Tako imate vremena da spasite sebe i druge osobe prisutne u Vašem domu i eventualno čak i da ugasite vatru. Detektori dima moraju biti postavljeni na najvišoj tački plafona i najmanje 50 cm udaljeni od zidova. Detektori dima se trebaju testirati najmanje jedanput mjesečno i svaki put kada ste duže vrijeme bili odsutni. Baterija se obično mijenja jednom u godini.



Zahtjev za opremu za gašenje požara

Sva domaćinstva moraju biti opremljena sa crijevom za vodu ili aparatom za gašenje požara. Preporučeno je imati oboje. Oprema za gašenje požara mora biti postavljena tako da se u hitnom slučaju može lako naći. Pažljivo pročitajte upute. Važno je da opremu za gašenje požara redovno servisirate i provjeravate. Provjerite da li slavina radi i da crijevo nije probušeno. Kod ručnih aparata za gašenje požara se provjerava da li je strelica manometra pritiska na zelenom polju. Okrenite aparat prema dole kako biste spriječili da se prah zgruša. Ukoliko otkrijete oštećenja na aparatu, kontaktirajte dobavljača kako bi aparat bio popravljen ili zamijenjen.

Požarni izlazi

U slučaju požara važno je da sve osobe koje se nalaze u Vašem domu mogu brzo izaći. Zbog toga trebate sa Vašom porodicom razgovarati o tome kako ispravno reagirati u slučaju požara i naći najbolje izlaze iz svake prostorije. Dogovorite se na kojem se mjestu izvan kuće ukućani trebaju naći. Požarne puteve držite slobodnim, pogotovo u stambenim zgradama sa puno stanara na svakom spratu. Provjerite da li se prozori i vrata mogu lako otvoriti i provjerite da li su potrebna dodatna pomagala, kao npr. požarne merdevine, itd.

Kako se ponašati u slučaju požara

- 1) **PROCJENA:** Prema vlastitoj procjeni situacije morate ustanoviti kada ćete poduzeti korake.
- 2) **SPAŠAVANJE:** Osigurajte da ste upozorili sve osobe prisutne u Vašem domu. Pomozite jedni drugima da stignete na dogovoreno mjesto. Uvjerite se da su svi izašli.
- 3) **PAŽNJA:** Obavijestite vatrogasce na broj 110. Recite im svoje ime i dajte im tačnu adresu zgrade u kojoj je požar.
- 4) **GAŠENJE:** Ako se vatra nije previše proširila, pokušajte je ugaziti. Nemojte se izlagati riziku. Ne zaboravite da je dim jako otrovan.
- 5) **UPOZNAVANJE:** Dočekajte vatrogasce i obavijestite ih o stanju kada stignu. Odmah im recite u slučaju da neko nije uspio izaći. Ne ulazite u zgradu da biste spasili kućne ljubimce ili lične stvari. Ostavite taj zadatak vatrogascima.



Budite pažljivi sa otvorenim plamenom

- Nikada ne napuštajte prostoriju u kojoj gori svijeća. Nikada se stavljajte upaljene svijeće pored zapaljivog materijala. Osigurajte da su svijeće na čvrstom, nezapaljivom svijećnjaku.
- Nikada nemojte pušiti dok ležite na krevetu ili kauču. Ukoliko zaspite, cigareta bi mogla zapaliti posteljinu i namještaj. Ispraznite pepeljare. Ne bacajte pepeo direktno u kantu za smeće.
- Ukoliko imate peć na drva ili kamin, morate koristiti suha drva i imati odgovarajuće gorivo. Jaka vatra sa neodgovarajućim gorivom može prouzrokovati požar u odžaku. Ne zaboravite postaviti zaštitnik pred kamin.

Zaštite se od podmetnutog požara

Nikada se ne možete zaštititi 100% od podmetnutog požara, ali izvjesne mjere su se pokazale efektivnim.

- Mnogi podmetnuti požari počinju sa materijalom koji je neoprezno skladišten ili odbačen. To može biti građevinski materijal, kartonske kutije ili otpad. Zbog toga trebate osigurati da na stepeništu, u garažama i na vanjskim zidovima nema zapaljivih predmeta koji bi mogli potaknuti na podmetanje požara.
- Izbjegavate ostavljanje kante za smeće blizu vanjskih zidova zgrade. Razmak između nezaključanih kontejnera i zgrade treba iznositi najmanje 10 metara.
- Mnoge stambene zgrade imaju interfon kako bi kontrolirali ulaz u zgradu. Ne dozvolite da neovlaštene osobe ulaze u zgradu.






Koristite električne uređaje ispravno

- Šporet: Uvijek pazite na šporet dok je uključen. Izbjegavajte korištenje visokih temperatura. Ako ste na trenutak prekinuti, zbog npr. telefonskog poziva, isključite gorionike. Nikada ne izlazite iz kuće ako prethodno niste provjerili da je šporet isključen.
- Ispusna kapa za paru (napa): Čistite napu iznad šporeta najmanje dva puta godišnje. Tu se skuplja velika količina masnoće koja se može zapaliti ako je temperatura šporeta previsoka.
- Mašine za pranje i sušenje veša: Uvijek isključite mašinu za veš, suđe i sušenje veša kada izlazite iz kuće. Nikada ne dozvolite da ove mašine rade dok ste Vi na spavanju. Očistite filter na mašini za sušenje veša poslije svake upotrebe.
- TV: Uvijek isključite TV na samom aparatu (on/off dugme) kada izlazite iz kuće i prije nego što idete spavati. Nije dovoljno isključiti TV samo preko daljinskog upravljača.
- Ostali električni uređaji : Morate uvijek isključiti svaki uređaj koji ima termostat (mašina za kafu, bojleri, pegla, fen za kosu, itd.) kad nisu u upotrebi. Dobro je koristiti tajmer koji automatski isključuje struju poslije određenog vremena.

Budite pažljivi sa električnim kablovima

Vlasnici kuća su odgovorni za to da su električne žice u redu. Ukoliko se izlazi, utikači, kablovi ili osigurači brzo ugriju ili pokazuju znakove gorenja morate što prije pozvati nadležne za električnu struju ili ovlaštenog električara. Nemojte pokušavati sami popravljati. Popravke «amatera» su ilegalne i opasne.



Lista za provjeru

	OK	Nije OK
1. Detektor dima je ispravno postavljen i radi kako je predviđeno.		
2. Potrebna kućna oprema za gašenje požara postoji i svi znaju gdje se ona nalazi.		
3. Požarni izlazi su slobodni i Vaša porodica se dogovorila o mjestu izvan kuće gdje se svi trebaju naći.		
4. Svi znaju kako se treba ponašati u slučaju požara i svi znaju broj vatrogasaca (110).		
5. Upaljene svijeće se stavljaju u čvrste, nezapaljive svijećnjake i drže se stalno na oprezu.		
6. Na stepeništu, u garažama i na vanjskim zidovima nema materijala koji bi mogli potaknuti na podmetanje požara.		
7. Šporet se drži na stalnom oprezu dok je u upotrebi i napa se čisti redovno.		
8. Mašine za pranje i sušenje veša se ne koriste dok ukućani spavaju ili ako niko nije kod kuće da pazi na njih.		
9. Televizor se uvijek gasi na on/off dugme - ne samo preko daljinskog upravljača.		
10. Popravke i zamijene na električnim kablovima izvodi samo ovlašteni električar.		



Norsk brannvernforening

Stiftelsen Norsk brannvernforening
Postboks 6703 St. Olavs plass, 0130 Oslo
Internett: www.brannvernforeningen.no

Denne brosjyren finnes på flere vanlige minoritetsspråk, og kan bestilles eller lastes ned fra www.brannvernforeningen.no.
Brosjyren er utviklet med støtte fra Utlendingsdirektoratet og Direktoratet for samfunnssikkerhet og beredskap.